



# Toqusimasup pigisaanik agguaassisarneq

Toqusoqarsimatillugu toqusup pigisaasa aningaasaataasalu  
kingornussisarnermik inatsit malillugu agguanneqartarnissaat  
eqqartuussisoqarfiup isumagisussaavaa.

| Kalaallit Nunaanni Eqqartuussiviit |

## **SULIAQ QANOQ AALLARTINNEQARTARPA?**

Palasi nalunaarfigineqaruni inuk Nunatsinni ilisaassasoq palasi toqusoqarneranik nalunaarummik eqqartuussisoqarfimmut nassiussissaaq. Pitsaassaq palasi qinnui-gigaanni toqusoqarneranik nalunaarummi allassagaa ilaqutaasut kina toqusimasup pigisaanik agguaassinissamut tunngatillugu eqqartuussisoqarfimmut attavigeqqu-neraat.

### **Malugiuk!**

Inuk, nunatsinni najugalik, nunami allami – soorlu Danmarkimi Islandimiluunniit, ilisaassappat ilaqutaasut toqusoqarneranik uppersaatiq, napparsimmavimmiit tunniunneqartartup, nuutsinneqarnera eqqartuussisoqarfimmut tunniutissavaat.

Inuk periarfeerunneqarpat ilaqutaasut eqqartuussisoqarfik attaveqarfigisinnaavaat, eqqartuussisoqarfiullu misissussavaa inuk toqusimasutut isigineqarsinnaanersoq imaluunniit periarfeeruttutut isigineqassanersoq.

## **EQQARTUUSSISOQARFIUP SULIAMIK SULIAQARNERA**

Eqqartuussisoqarfik toqusoqarneranik nalunaarummik imaluunniit inuup toqusi-maneranut uppersaammik allamik tigusaqaruni pisortanut suliffeqarfinnullu assigiinngitsunut saaffiginnissaaq, paasiniarlugu toqukkut qimagussimasoq aningaasanik pisassaqaqarnersoq imaluunniit isumaqatigiissusiorsimanersoq, atorunnaarsitassanik. Eqqartuussisoqarfiup ilaatigut makku attaveqarfigisarpai:

- Kommune, paasiniarlugu ilisinermit aningaasartuutininik akileeqqusisoqar-nersoq aamma utoqqalinersianik pisassaqaqarnera.
- Aningaaserivik, toqukkut qimagussimasup kontoi matutinniarlugit aamma pigisanut kontomik ammaatitsiniarluni.
- Illerfissarsiniaqatigiit, paasiniarlugu toqukkut qimagussimasoq ilaasortaasima-nersoq.
- Kommunimi Inissiaatileqatigiit, paasiniarlugu toqukkut qimagussimasoq attar-tortuunersoq aamma aningaasanik pisassaqaqarsinnaanersoq.
- Nukissiorfiit, paasiniarlugu isumaqatigiissuteqartoqarnera atorunnaarsitas-samik aamma toqukkut qimagussimasoq aningaasanik pisassaqaqarnera.
- Akileraartarnermit Aqutsisoqarfik, akileraartarnermit paasissutissat kingulliit piniarlugit
- Brugsen, paasiniarlugu toqukkut qimagussimasoq ilaasortaasimanersoq
- TV-qarfiit, paasiniarlugu toqukkut qimagussimasoq ilaasortaasimanersoq
- TELE Post, toqukkut qimagussimasup allagarsiassai eqqartuussisoqarfimmut nassiutinniarlugit postboksiusinnaasorlu taamaatinniarlugu.

- Danmarkimi Pisortatigut Nalunaarsuisarfik, paasiniarlugu toqukkut qimagussimasoq eqqartuussisoqarfimmi kingornussassialiorsimanersoq.

Toqukkut qimagussimasoq toqunermini aningaasanik kaasarfimmioqarsimappat aningaasat Eqqartuussisoqarfimmut tunniunneqassapput. Aningaasat pigisanut kontomut, tigusiffigineqarsinnaanngitsumut, ikineqarnissaat Eqqartuussisoqarfiup isumagissavaa.

Eqqartuussisoqarfiup toqusoqarneranik nalunaarutisiniariassalluni aningaaserivik qinnu-igissavaa toqukkut qimagussimasup kontoi tigusiffigineqarsinnaajunnaarsinneqassasut aamma pigisanut kontomik ammaasoqassasoq.

Toqukkut qimagussimasorlu ataatsimut kontoqarsimagussi aningaaserivik kontotaar-niarlutit attaveqarfigissavat. Aningaasaatitit ataatsimut kontomiit illit kontotaannut nuutsinniarlugit eqqartuussisoqarfik attaveqarfigissavat.

Eqqartuussisoqarfiup immersugassaq toqukkut qimagussimasup qanigisaanut nassiutissavaa, paasiniarlugu toqukkut qimagussimasoq sunik pigisaqarnersoq aamma katisimasimanersoq. Eqqartuussisut immersugassaq tigoreerunikku nali-liissapput ilaqutaasut eqqartuussinermut aggersarneqassanersut.

Toqukkut qimagussimasoq aningaasaatikippat aningaasanillu nalilinnik pigisakip-pat suliaq naammassineqassaaq ilaqutaasut ataatsimeeqatigineqanngikkaluartut. Taamaattoqartillugu aningaasat ilisinermut aningaasartuutinut suliallu suliarine-qarneranut aningaasartuutinut allanut akiliutitut atorpeqartarput. Aningaasanik sinneruttoqassappat taakku toqukkut qimagussimasup qaniginerpaasaanut tun-niunneqassapput.

Toqukkut qimagussimasoq aningaasanik nalilinnik pigisaqarpat eqqartuussiso-qarfik ilaqutaasumik/nik aggersaassaaq, ilaqutaasut periarfissaannik ilitsersorni-arlugit. Ataatsimiinnermi eqqartuussisut aalajangissavaat suliaq qanoq suliarine-qassanersoq.

Toqukkut qimagussimasup akiitsui akissaqartinneqarpata aamma ilaqutaasut isumaqatigiissutigisinnaappassuk aningaasat sinneruttut qanoq agguarneqassasut, suliaq eqqartuussisoqarfimmi piaartumik naammassineqarsinnaassaaq. Allatut pisoqartillugu suliaq eqqartuussisoqarfimmi ukioq ataaseq tikillugu suliarineqar-sinnaasarpog.

## ILAQUTAASUNUT SIUNNERSUUTITSIALAAT

- Toqukkut qimagussimasup pigisai illuutaalu paarilluakkit.
- Toqukkut qimagussimasup tigutsisaa, kontokortia, aningaasaatai, illumut, biilinit qamuterallannut angallammulluunniit matuersaataa eqqartuussi-soqarfimmut ingerlaannaq tunniunneqassapput.
- Eqqartuussisoqarfimmit akuerineqarsimatinnak toqukkut qimagussimasup kontoaniit tiguseqqusaanngilatit.
- Eqqartuussisoqarfik oqaloqatigereersimatinnagu toqukkut qimagussimasup akiligassai akileqinagit.
- Immaqa allattorsinnaavatit toqukkut qimagussimasup pigisai, aningaasanik nalillit – tassa pigisat tunineqarsinnaasut.

Inatsiseqarnikkut ajornakusoortumik inissisimaguit imaluunniit inatsiseqarnikkut apeqqutissaqaruit, akeqanngitsumik eqqartuussissuserisumut nalinginnaasumik imaluunniit annertusisamik inatsisitigut ikioqqusinnaavutit. Eqqartuussissuserisut inatsisitigut ikiuisartut allattorsimaffiat uani takusinnaavat:

<https://domstol.dk/gl/groenland/eqqartuussisoqarfiit-atukkit/inatsisitigut-siunnersorneqarneq/gl-retshjaelpsadvokater/>

- Toqukkut qimagussimasup ilaquataasa immersugassaq immersussavaat. Taanna uani takusinnaavat [www.eqqartuussivik.gl](http://www.eqqartuussivik.gl), nammineersuutissat, immersugassat
- Toqukkut qimagussimasup pigisai paarilluakkit.
- Toqukkut qimagussimasooq aningaasanik tigumiaqarsimappat taakku eqqartuussisoqarfimmut tunniunneqassapput
- Toqukkut qimagussimasup aningaaserivimmi kontoaniit tiguseqqusaanngilatit.

## ATTAVEQARFISSAQ

Arlaannik nalornissuteqaruit imaluunniit ilitserorneqartariaqaruit paasissutissat amerlanerit uani takusinnaavatit: [www.eqqartuussivik.gl](http://www.eqqartuussivik.gl) imaluunniit eqqartuussisoqarfik sianerfigisinnaavat: 36 38 00